

# Kirche im hr

---

13.08.2014 um 05:20 Uhr

hr1 ZUSPRUCH

Ein Beitrag von  
Helwig Wegner-Nord,  
Evangelischer Pfarrer, Frankfurt

## Mein Bekannte, de Kall, plädiert fer Kobbtuchträscherinne im Staatsdienst

Mein Bekannte, de Kall hat sich neulich beim Einkaufe im Subbermarkt reschelrescht erschrocke. Wie er da, ganz in Gedanke grad uff den Zeddel guckt, wo em sei Helga mitgebbe hat, damid er net widder die Hälft vergisst, da iwwerholt ihn e Fraa, ganz in schwarz, also werklisch: ganz! Mitere sogenannde Burka. Vom Kop bis zu de Fieß verschleiert. Nur an de Aache warn Schlitz, wo se dorschgucke konnt. Da hat er gesehe, dess se e Brill uffgehabt hat.

Wie gesacht: erst is mein Bekannte zesammegefahrn – so hat er sich verschrocke. Dann hatse ihm erschendwie leid getan. Die arm Fraa, hat er gedacht, bei dem haaße Sommerwedder so aagewickelt rumlaafe ze müsse!

Un widder e paar Minude späder is ihm dorsch de Kobb gange, dess er sich eischendlich mit der Fraa gern ema unnerhalde tät. Was se so denkt. Wies ihr geht. Un warum se sich so verschleiern duht. Aber des hat er nadürlisch net gemacht. Ersdens macht mer sowas net un zwaatens is des versteckt Gesischt ja aach net werklisch en Aagebot zum klaane Schwätzsche.

Mein Bekannte is also weider. Da warn aach noch annere Leut im Lade, drei Fraue sogar mit em Kobbtuch. Naa, net mit som Kobbtuch, wie sei Oma immer aans getraache hat, frieher in Oberhesse. Sonnern so e muslimisch Kobbtuch, also, wie er jetz gelernt hat: em Hidschab. Is ja aach verrickt, denkt de Kall, dess des en Unnerschied macht: warum aans en Kobbduch träscht, wesche de Religion, oder wesche de Mod, oder weil se grad e Chemotherapie gemachd hat un kann Haarn mehr hat.

De Kall hat sich gedacht, dess die Kobbtuch-Fraue eischendlich mit dere

schwarz Fraa ma redde müsst! Des wärn ja eischendlich die rischdische defür. Könnte ihr sozusaache von Muslima zu Muslima e bissi entgeschekomme.

Ja vielleischd hätt mer sisch all die Jahrn über die Kobbdüselscher von dene Muslimische Fraue net so forschbar uffresche solle. Un vor allem dadrüber, ob se dademit Lehrerin sein dürfe?! Herrschaftzeite, was fer Diskussione sin da gefiehart worn. Un was fern Bockmist da an de Stammtische verzabbt worn is!

Jetzt könnde mer en paar von dene Kobbduchträscherinne gut gebrauchte. Als Vermittlerin sozusaache zu dene Burkaträscherinne. Wanns zum Beispiel e muslimisch Lehrerin mit Kobbtuch gebbe tät, die ma mit soner Burka-Fraa, die grad ihr Kinner zur Schul bringt, ins Gespräch käm? Mein Bekannde, de Kall, waaß aach net rescht, wies rischdisch is. Aber dess mer über staatliche Bekleidungsverschrifde net weider kommt, wann mer annere Mensche erreische will, des is ihm eischendlich schon länger klar.